

KUMPUAN
RAMLEHHNAM
HUMHALH

YMA

AW



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.8 19th Feb. 2012

LOCAL COUNCIL INTHLAN CHUNGCHANGA HRIATTIRNA

Chanmari West, February 19 : Tunkar Ni 23.2.2012 (Ningani)-a Chanmari West Local Council member kan thlan turah heng a hnuia tarlante hi Political Party-te, Candidate-te leh mipuite hriat tur leh zawm theuh tura State Election Commission thu chhuak a ni e.

1. Dt.23.2.2012 zing dar 7:00Am-ah Vote thlak tan tur a ni a, tlai dar 4:00Pm thleng vote thlak theih a ni ang.
2. Hetiang hi vote thlakna hmun tur (Polling Station) a ni -
 - Chanmari West - I = Govt.Primary School, Chanmari West
 - Chanmari West - II = Govt.Middle School, Chanmari West
 - Chanmari West - III = Chanmari West High School
3. Vote thlak turte chauh lo chu Municipal Election Officer phalna nei lo chuan tumah Polling Booth-ah luh phal a ni lo.
4. Mi tu pawh Candidate emaw, an Agent emaw, State Election Commission phalna nei emaw an nih loh chuan Vote thlakna hmun (Polling Station)-ah leh Vote chhiarna hmun (Counting Hall)-ah luh phal a ni lo.
5. Vote thlak turte chuan EPIC (Electoral Photo Identity Card) ken tur a ni a. EPIC nei lo, Electoral Roll-a chuang si te chuan heng a hnuia tarlan zinga a eng emaw ber hi ken ngei tur a ni.
 - 1) Driving Licence 2) Passport 3) Income Tax Identity(PAN) Card 4) Service Identity Card
 - 5)Bank/Post Office Passbook 6) SC/ST/OBC Certificate 7) Students Identity Card
6. Polling Station chhungah leh Counting Hall chhungah Candidate emaw, an agent-te emaw, Election Official i.e. Presiding Officer/Polling Officer emaw ten Mobile phone an hman phal a ni lo.
7. Counting Hall chhungah Counting Agent-te Mobile phone ken luh phal a ni lova. Returning Officer, Observers, Counting Official leh Security duty te chu Mobile phone ken phalsak an ni a. Mahse, an phone chu Silent mode-ah an dah tur a ni.
8. Polling Station chhungah leh Counting Hall chhungah Meizuk phal a ni lo.
9. Vote hi Govt.Middle School, Chanmari West-ah dt.23.2.2012 Zan dar 7:00 PM-ah chhiar a ni ang.
10. Vote chhiar zawhah result puan nghal a ni ang.
11. Dt.22.2.2012 zing dar 7:00AM thleng Campaign phal a ni a. Hemi hnu lamah chuan phal a ni tawh lo.

THLA THARAH THISEN PEK RUNPUI

Ni 8.3.2012 (Ningani) khian Aizawl Civil Hospital-a hman turin kan Branch YMA chuan thisen pek runpui Chanmari West Govt. Middle School-ah neih a tum a. Section hrang hrang hruaitute'n a pe thei tur an rawn zawng dawn a, a tam thei ang ber lo inpe tura ngen inni, hruaitute hnena hmung pe remchang hman lo pawhin, a hmunah hian kal a, pek mai tur a ni. Tun atang hian memberte pawh lo inla 'fit' tura ngen inni a, Member a tam thei ang ber midangte tana thisen pe tura sawm inni e.

Branch News

 Zawlbuak sakna atan Pu L.Nghakliana 'T'Section chuan cement bag khat min pe a, a chungah Branch YMA chuan lawmthu a sawi.

 Kan Branch Vice President Pu R.Lalhmachuana Office thil a Shillong zin pawh dam takin a lo haw e.

 Kuang atana thingphek neih sa a zawhah plyboard hman tum a ni.

 Local Council inthlanna neih turah, MPF Chanmari West ten min rawn ngen angin, thu puan zarna atan Information mike hman phalsak an ni a. Inthlan senso atan Rs 500/- thawh a ni bawk.

 YMA ten kan hmalakna kawng hrang hrangah hun tiem a awm chuan, hun tiem ngai pawimawh hram turin kan innge e.

 Pu PC. Lalawmawia Vanapa Section Finance Secretary chuan thlanmuala hman turin Lungral a rawn pe a, a chungah Branch Committee chuan lawmthu a sawi.

LUSUN KHAWHAR

Ni 13.2.2012 khan Pi Suakliana Kum 88 W/o K.Hmingliana (L) 'K' Section chuan min boral san a, a kalsan tak a chhungte Chanmari West Branch YMA chuan a tuarpui takzet a ni.

NGENNA

YMA Park CH-Section leh Turning Point (Sub-Centre kawt) N-Section-ah zan riaka motor dah phal loh chunga la dah lui tlat in la awm a, dah tawh lo tura hriattir in ni, in dah leh a in motor in a lo tuar anih pawha lo hrethiam tura ngen in ni.



TUNKAR CHANGVAWN

"LALPA chuan, " Hawh teh u, ingaihtuah tlang teh ang u; in sualte chu sen lar angin awm tawh mah sela, vur angin a var ang; senduk angin awm tawh mah sela, beram hmung angin a awm ang." a ti a.

Isaia 1:18

Editorial Board

Editor

J.Lalnangliana
9862399658

Joint Editor :

Lalchhandama
9862358347

News Editor

Thangkhuma
9862303135

R. Lalrinnghet
9862358337

Jacob Lalrinsanga
9612319779

Cir. Manager

Johny Lalthanpuia
9612359161

EVL. Hruaitluanga
9862655426

Production Manager

R.Lalhmachhuana
9436151817

Branch Office Bearer

President

T.Ngurkhuma
9436190843

Vice President

R.Lalhmachhuana
9436151817

Secretary

RL.Thanhnuna
9436152760

Asst. Secretary

Zairemmawia
9862385654

Treasurer

C.Lalzarliana
9436142049

Fin.Secretary

K.Darthantluanga
9436196071

Advisers

Pu Lalbiakthanga
Khiangte
Pu Rothuama
Pi Zamanthangi
Pu Lalrengpuia
Sailo

2012 Thuvawn

Iawmdan tur chu
LALPA chungah
nghat la; Amah
chu ring la, aman
a ti vek ang.

Editorial :

Thil khawn hun lai a ni a, chhung tinin thil awmzia hriatthiam a ngai hle. Section hruaitute'n thil hrang hrang an khawn a, a khawntu nih chuan inthlahrunna tur khawpin khawn a tam. Mahse, kum tir a ni a, a hun lai anih miau avangin a tih loh theih lo. YMA chauh ni lovin kohhran leh pawl dangah pawh khawn a tam hun lai tak a ni ve leh zel a, mipui tan chuan ninawm tak a ni thei.

Tunkar ningani hian veng chhung roreltu tur kan thlang dawn a, mi 16 tar chhuah an awm. Heng kan veng tana inhuam atang hian mipuiten mi pasarih kan thlang dawn a, khua leh tui thate mawhphurhna chu vote thlak a ni tih hi ram rorelna kawng hrang hranga inthlan a awm chang hian hriat nawn fo a ngai thin.

Candidate-te tlin lohna lai zawn vak hi thil awm thei a ni a, keimahni pawhina kan tlin loh leh kan nih phak loh tha famkim ni turin kan phut a, sawisel chiamte a awl hle. Tute

pawh hi ding se sawisel kai lo an awm lovang tihi chiang sa a ni a, candidate kan neih mekte atanga tha kan tih thlan thiam mai hi thil fintlhak leh kan chin dan tur atana tha a ni a, fel ber ang ziazanga candidate-te tlin lohzia leh nepzia lam sawi vak vak hi awmze nei lo a ni.

Political party pawhin mipui it tur zawn thiam hi eng lai pawh candidate siamna kawnga tha a ni tih hriat tel a tha a, party ringawt ngaihtuah lova veng ngaihtuah thlen phak hi party leh veng tan pawha hamthatna telna ve ve a ni tih hi thil pawmlak tak a ni.

YMA AW-ah hian thu pawh hla pawh a chhuah theih a, veng chhung mi a tam theih ang ber thu ziak chhuah theih ni se tih hi kan duh dan a ni. Mahse, mimal inbeihna pawi thei te, zahmawh rawng kai leh inzirtirna dik lo thei lakah erawh fimkhur ni se. Tun tumah pawh hian thu sep bakah hla uang kan han telh e, inthlan a hnaia inthlan thu a tam lo thei lo a ni.



Local Council inthlan tur hi

LR Ralte N Sect

Kan hma lawkah kan khawtlang hruaitu tur kan thlang leh dawn a, Candidate pawh vote zawngin an hmanhlel ta hle mai, Candidate-te chau ni lovin an party mipuite leh an chhungkuate pawh an thu mai mai hman ta lo.

Hei lo chu "Ka Veng" tihtur kan nei lo, khawtlang hmasawnna tur atan leh veng dangten an entawn tur khawp a thianghlimna ngaina mi kan thlan chhuah theihna turin rilru fim tak pu a vote kan thlak a va tha em!

Khawtlang thatna tur kan duh a, veng hmasawn leh thianghlim tak kan neih theihna tur atan Candidate zawng zawngte khawsak dan thlenga kan zirchian a tul anih pawhin nakin lawka kan phun kan phun a ngaih dawn ai chuan tun atang hian taima takin i zir chiang hmasa ang u.

Candidate-te zingah Ui, Ar, Vawk etc vulh pawh an awm ang, an ran vulhte zun leh ek thlite vantlang tana rimchhia leh hnawk an ni em? Nge khawtlang zahthiam takin midang tana rimchhe lovin fel takin an luankhawm tir zawk, hengte thleng hian kan chhut tel a tul asin. Chutiang ni lova an Ui vulh te, an Ar vulh te leh an Vawk vulh te veng tana hnawksak leh rimchhiat pawh pawisa lo, sum a khawtlang ti lungawi leh mai thinte kan thlan chhuah leh mai chuan, a phun turté chu thlang tling tute bawk anni leh dawn a, chuvangin, veng tana thahnemngai tak rilru pu a, khawtlang hruaitu tur, veng hmangaih tak taktu, veng hmasawnna duh tu, veng thianghlimna ngai pawimawh tur, rilru zim ni lo, rilru zau tak pu mi kan thlan chhuah theih nan ngaihtuahna tak tak i seng theuh ang u. Kan "Veng" tan a ni si a.

Ningzu rui Zodika Pa

Lalhmingliana T

Ami lengte'n raltingah thiam run bel a, Tinkim an dawn laiin, chheih raw! ZodikaPa'n; A dawn sual senzu a dawn, eng dawn lovin.

Raltingah hriat loh run laichhuat mam laiah, Chham ang a zal, zal pui tur chu vana rah ang; Thlarauva thar tawh, tisa a thar nawn chu!

Lengzawngte'n amte'n tang an belh lai khan, Chhuatpui mam a bel lungsiin, Zodika Pa'n; Aw i maw! mahriakte'n run lam haw a zuam lo.

Tisa a siamthar chu senlai nau iangin, Bawk vaka haw zai a rel! awi! Zodika Pa'n; A meng phelh phung, a thle bur bur a thlunglu.

Theitui chu Uain a chang ta em ni?
Siktui an hung sual em ni?
Theitui an dah TENG a tin ni?

(2002-a a phuah a ni a, a phuahtu hian ningzu hi ning tawh se kan va ti em Ed)

DERDEP LEPLER

Ti-a

Tawn khatin tawn sawm a tawng tawh a, Tang khatin tang sawm a bel nuam bawk; Tawnsabawp tam tak a tawng zel a, Tawntirh a tawn tin, a nel huam bawk.

A zunpuiin a uai diai duai;
Anka thlum tam a fah liai luai.

A rawn seih sak chu laikhum thlehnem, A ngurchuai chuan ningzu a mamawh; A biahtu di chu kuangkuah tangnem, A sel che chuan thatna tih hre rawh.

(2000-a a phuah a ni a, mi dangte tan hla phuah a chhuah theih tih entir nan chhuah a ni.)

NEUVA

» Kum 2012 chhunga Neuva section member tur lak fel a ni ta a, mipa - 252, Hmeichhia - 144 A vaiin - 396 anni a, Life Member - 19 an awm bawk. Member-a la inpe lote an awm anih chuan Section secretary hnenah inpek theih a ni.

» Chhiatni Fund khawn mek a ni a, February thla chhung hian Branch-ah submit angaih avangin chhungtin ten thahnemngai takin lo pek i tum ang u.

» Ni 8.3.2012-a Branch YMA huaihawt a Chanmari West Middle School a thisen pek turah member atam thei ang berin pe turin an innge.

» An Section hruaitu lo ni tawh Ni Lalhmingmawii chuan Ni 16.2.2012 khan kawppui duhawm tak a nei chu an lawmpui hle.

» Branch YMA ngenna ngai pawimawh a Turning Point-a Motor dah tawh lote chungah lawmthu an sawi. La duh lui in awm anih chuan engpawh thleng se Branch hmalakna insawisel thei lovang.

» Section chhungah bawlhhawh bawm khai tura hmalak mek a ni a, bawlhhawh bawm rawng lo hnawihtu Pu Laltanpuia te, Pu Lalgaihawma te, Pu H.Vanlalsawma leh Pu Lalremruata te chungah lawmthu an sawi.

» Chhungtin ten mahni in leh vel vawngfai theuh turin an innge.

CHAWNGBAWLA

» Section Bungraw hawh chhuak tur te'n Leader emaw Secretary hnenah emaw dilna siam a Property incharge Tv. Lalfakzuala (Afaka) hnenah a hriatpuiin bungruate hawhin dah thin tur a ni, chhiatni lovah bungraw hawh tur ten zing dar 6:00 - 9:00 leh tlailamah dar 4:00 - 6:00 chhunga hawh/dah tum hram turin an innge.

» An hruaitu Ni. Vanlalmuani Pachuau Durtlang Hospital a zai avanga awm pawh inlamah in enkawl turin a lo chhuak ta, a dam that zel an duhsak hle. » Ni 8.3.2012 a Branch YMA hminga civil hospitala thisen pek turah section memberte lo inla fit turin an ngen.

» Tun dinhmunah YMA AW man Rs. 9920.00 an thehlut tawh a, YMA Aw hi chhungkaw 202 in an la mek a ni.

» Chhiatni fund Rs. 46575.00 an thehlut tawh a, chhungkaw 237 awm mekin, chhungkaw 124 in an pe tawh a ni.

» Tunlain khua a ro leh tan ta hle a, mipuite kangmei chhuak thei lakah fimkhur turin an inchah.

» Ni 18.2.2012 nileng khan Leader

Workshop-ah kuang duan hnatlang neih a ni.

» Ni 14.2.2012 zan khan buaina awmna thin 'Pin Point' kawng kawipuiah Vaivakawn Police-te nen 'Joint Operation' neih a ni a, hetiang hian 'duty' fo tum a ni.

KHUANGCHERA

» Ni 16.2.2012 (Ningani) zan khan YMA Runah section Committee meeting neih a ni a, thu pawimawh tak tak an rel.

» Ni 23.2.2012 (Ningani) khian hruaitu hnatlang (Bungraw enfel) neih tur a ni a, hruaitute'n ngai pawimawh theuh turin an innge.

» Branch YMA-in Ni 8.3.2012 (Ningani) a mamawhtute tan thisen pek runpui a neih turah a pe thei tur section hruaituten an rawn zawng dawn a, Khuangchera section YMA member-te tlawmngaia pek tum theuh turin an innge.

» An member Ni Zomuansangi D/o Lalrinmawia'n Lunglei Bazaar Veng lama pasal tha tak a nei tur chu an lawmpui tak zet.

TAITESENA

» Ni 17.2.2012 (inrinni) khan a vawi khatna atan Faina hnatlang neih a ni a, member thawkchhuakte chungah lawmthu an sawi.

» Section bungrua hawhchhuaktu te'n dim tak leh fai taka enkawl turin an innge.

» Section member Exam bei mekte tha taka an tih theihnan duhsakna an hlan.

» Chhiatni Fund leh YMA AW man bial neitute'n an khawn chin apiang thehlut nghal zel turin an inhriattir.

» Veng chhunga damlo awm zawng zawngte an dam thuai an duhsak hle.

» Chhiatni fund-ah Rs. 30600.00 hmuh tawh a ni.

VANAPA

» Chawljni tlai dar 3:00 khan Chhiatni Buhfai khawntu leh YMA Aw semtu tura ruat tharte Treasurer Pu T.Sangkhuma (SKA) inah thingpui inho pahin infuih tharna hun hman a ni.

» Pi Tluangi w/o Thangseia damlohma avangin damdawiin leh in lamah enkawl mek a ni.

» YMA member lak, chhiatni Fund khawn, YMA Aw man khawn leh Census hna thawh mek a ni a, Chhungtin ten lo ngai pawimawh hram hram turin an innge. Chhiatni Fund khawn sa ang ang Finance Secretary

PC Lalawmawia hnenah Receipt nen thehluh nise.

» Pu C.Rosangliana ten naute thar an nei.

» An hruaitu hlui NI R. Lalrinthangi'n Bethlehem lamah Khiangawih mai a tum chu an lawmpui rualin an ui takzet a ni.

» March ni 8 a Branch in Thisen pek runpui a neih turah Section Memberte Thisen pek tum theuh turin an innge a, hruaitu ten thisen pe thei turte an rawn zawng chhuak dawn.

» February ni 28 ah Section Committe that tum a ni.

Thusep

BRIEF CASE HRANG

J.Nanga

"Sir chu a chhuak ta em ni a?

Aw chhuak ta anih kha.

A inkhai chhuak nghal em?

Aih, khai chhuak lo, a lo kir leh dawn a ni ang.

Inkhai chhuak nghal law law se tha tur aw."

Ni e, inkhai chhuak nghal law law se chuan pisa atangin an haw ve nghal mai thei tur a ni a; mahse, pu ber room chu chu Brief case chuan a la luah tlat avangin nutling patling rual chu an la haw ngam lovin an la awm thup mai a ni.

Chu Brief case chuan thiltihtheihna ropui tak nei awm hmel a pu hran lova, hlauhawm awm tak pawhin a awm chuang hek lo. Brief case tha pangngai tak a ni a, a man pawh a neitu phu tawka tam chu a ni ngei ang, mawi tawk tak a ni. A that lehna riauna lai chu a neitu awm loh lai pawhin a nauteho a la thunun tha zel thei chu a ni.

Brief case chhungah chuan pawisa leh lehkha pawimawh hmel tak tak hlii mai lo chu thil dang a awm lova, ropui raphlak pawh a ni lovang. Chutihlaaiin, rap leh tihibaiawm hmel tak pawh ni chuang bawk si lo, hetia amaha a awm mai mai lai pawh a, pisa chhuahsan ngam lova an han awm ta tlat mai si hi chu a mak ngawt nia, he Brief case hi a hrang a ni chiang ang.

(Kan Adviser Pu Biakthanga leh Pu Rothuama te Brief Case pawh hi an naute tan chuan a hrang ve mai thei a ni!! Ed)

RED RIBBON FOOTBALL

Local Council Football Team Durtlang Field-a Practice nana lirthei thawhtu Pi Biakhluni 'K' Section chungah lawmthu an sawi.

Local Council Football Team tana thil pek petu mi 8-te chungah hian lawmthu an sawi:

Tv.Lalsawmzuala 'CH'	- Rs.3500
Pu C.Lalzarliana 'CH'	- Rs.500
Pu Henry Remruatpuia 'N'	- Rs.500
Pi Zamanthangi 'K'	- Rs.500
Pu H.Vanlalzika 'T'	- Rs.100
Pu Zarzolian Chhangte 'N'	- Rs.100
Pu Lalrohnuna 'N'	- Rs.200

Lawmthu sawina

Pathian venna leh kaihruaina azarah V/C leh Local Council term kum thum chu ka hmang zo ta der mai a, khawtlangah tling lo takin NGO leh mipuite tawiawmna avangin Pathian hnenah lawmthu ka sawi tak meu meuh a, kum thum chhung tling lo taka ka hruainaah khawtlangah buaina lian tham engmah a awm lova, furah leimin nasa a awm lova, kangmei chhuak a awm lo bawk a, thubuai lian tham kan tawng lo bawk. Heng avang hian kan veng vanneihzia hi ropui ka ti hle a, Pathian hnenah lawmthu ka sawi nawn leh a ni.

Tun tuma Local council kan thlan leh turah pawh hian hruaitute tluang taka an kal zel theih nan duhsakna ka hlan e.

Vanlalhuma
Chairman, Local council

KEIMAHN

YMA AW chhutnaah Editorial Boardah Laljawa tih loh chu kan la kal kim zel a, nuam pawh kan ti tleng zel. Kan Branch OB Tv Zaitea'n min tawiawm avangin kan lawm e.

YMAAW lak dan: T Section - 235, V Section - 215, CH Section - 202, K Section - 201, N Section- 146, TT = 999

YMA AW receipt daih lo kan awm chuan Editor hnenah lam belh theih a ni.

SA THIANGHLIM

Sa thianghlim, ngaihtha taka ei i duh chuan hengte hi kan nei reng e.

1. Ar puah sa - Rs. 200.00
2. Vawksa rep - Rs. 180.00
3. Sangha - Rs. 130.00

Kg 10 chin chunglam lei tan DISCOUNT kan pe bawk e.

VOHBIK SA DAWR
CH Section, near Kawrpui
Chamari West.
9615332544

Inthlan chungchanga

MPF thuchhuah

MPF leh Political party hrang hrang aiawhnen thawhhona thuthlung an siam a, heng a hnuiai tarlante hi candidate te, party tin leh mipuiten inthlanna fel fai tak a awm theih nan zawm hram tur a ni.

1. Sum leh therhlo hmanga vote lei leh rralh hi tih loh ni se.
2. Ruaitheh leh picnic tih loh ni se.
3. Mipui, pawl leh Kohhranten political party te leh candidate-te hnenah thilphut neih loh tur a ni.
4. Inthlanni-ah candidate leh party tumah in boruak siam nan zu leh ruihtheih thil dang an chelek tur a ni lo.
5. Mimal chungchanga thudik zikluak lo leh dawt hmanga inbeih loh tur a ni.
6. Inthlanni-ah vantlang thingpui lum loh tur a ni a, Polling booth area huam chhung leh bulhnaiah tumah in thil zawrh loh tur a ni.
7. Polling booth area bul hnaiah electoral roll en leh number pekchhuah hi election model code of conduct in a sawi angin political party ten a malin an buaipui tur a ni lova. MPF kaihruaina in fimkhur taka buaipui tur a ni ang.
8. Model code of conduct in a sawi angin Candidate pakhatin banner pakhat leh a symbol 4 aia tam Local Council area chhungtar loh ni se.

9. Model Code of Conduct in a sawi angin Vote thlak tur te chauh lo chu tumah, Municipal Election Officer phalna lo chuan Polling booth ah an lut tur ni lo.

Thlanmual Sub-Committee

1. Ni 17.2.2012 zan khan an Assistant Secretary Tv Lalhriatzela (Sena) Chawngbawla Section-te inah meeting pawimawh tak neih a ni.

2. An Vice Chairman Pu PC Lalawmawia'n thlanlaihna a hman turin Lungral tha tak mai a pe chu lawmawm an ti hle.
3. Ni 20.2.2012 (Thawhtan) zingkarah khian Thlanmualah thing thlak hnatiang neih tur a ni a. Thlanmual Sub-Committee Memberte kim tak a kal tura ngen kan ni e.
4. Vengchhungan chhiat kan tawhin, tlawmgai a thlanlai tura chhuak tlangvalte hma taka kal thin turin an ngen.

HETAH HIAN SMS LA >>9862358337<<

Nl. Elen Lalrintluangi CH Section hruaitu nula senior pui kha chawlhi hmasa tlaiah khan Sub-Centre kawtah Naupang BMX a chuan sak, a tlukpui a, ake ruh hmun thumah a tliak a, Nula senior pui Pathianni tlaia naupang BMX a han accident chuh, zia lo khawp mai. 96151---53

Chawngbawla Section YMA Leader nupui Pi Ma-i chuan Sentlang khual tha tak a thleng niawm a hriat a ni, Pu Tlana'n a ti. 96126---78

Lumen zana Keyboard hman hi zai a tui duh hle a, hman zel tura tih nge hriatchian ava chakawm ve? 98621---35

(SMS kan dawn te hi Ed. Bd ngaihdan a ni vek kher lo)

UI BO

Ni 17.2.2012 khan kan uinu, thla li (4) a upa, a dum hlang, nghawng awrh sen awrh chu kan in bul atangin a bova, a lo hmu leh a awmna chin hria chuan Ph No. 9862814696 emaw 9089607530 ah emaw hian min rawn hriattir thei ula kan lawm hle ang.

T. Rohmingliana,
House No:T-3,
Chamari West.

VOLLEYBALL NEWS

* Tlangsam Lal Thanglianga Sailo memorial volleyball tournament, Ni 13.3.2012 atanga tan turah tel tum a ni a, thawleth tlaibar 4 atangin Indoor Stadium-ah inbuatsaih tan turin playerete an hriattir.

* An committee member Nl Lalrinthangi'n naktuk (thawhtanni) chhun dar 1:00 hian Bethlehem Veng Presbyterian Kohhran Biak Inah pasal a nei dawn a, inneih lawmpui turte Pu Lalthanzuala inah innghakkawmin chhun dar 12:00-ah chhuah tur a ni.

ZOFA NEWS

Ni 20.2.2012 (thawhtan) zan inkawm ban hian All India Radio-a hla khung tur, Pu Nundanga inah zir tur a ni a, member leh hruaitute kim taka kal vek turin an inhriattir.

Member thar lak mek a ni a, Culture lama tui mite inpe theuh turin an sawm.

Ni 20.2.2012 (Thawhtan) hian MCO General Assembly leh Election neih a ni dawn a, Club aiawh turin mi paruk an tel ang.